

樹

藝

篇

草類上品之下

黃蓮

絡石 地錦 扶芳 土鼓 石血 薜荔 木蓮 常春藤

蒺藜子

黃耆

肉蓯蓉

蒲黃

香蒲

續斷

漏蘆

天名精 即地菘

丹參

飛蕪

五味子

旋花 續筋附 即鼓子花

忍冬 即金銀藤

蛇床子

地膚子

景天

茵陳蒿

沙參

白兔藿

徐長卿

薇街

雲實

王不留行

鬼督郵

白花藤

留軍待

地不容

獨用將軍

山胡椒

燈籠草

人肝藤

越王餘筭

石蓴

海根

刺蜜

骨路支

長松

合子草

黃蓮

圖經曰黃蓮生巫陽川谷及蜀郡泰山今江湖荆夔州郡亦有之以宣城者為勝施默者次之苗高一尺已來葉似芹菊四月開花黃色六月結實似芹子色亦黃二月八月採根用生江左者根若蓮殊其苗經冬不凋葉如小雉尾草正月開花作細穗淡白微黃色六七月根緊始堪採

黃蓮葉如小雉尾草經冬不凋八閩通志

黃連曰王連曰支連草木畧

絡石

圖經曰絡石生泰山川谷或石山之陰或高山巖上或生人間今在處有之宮寺及人家亭園山石間種以為飾葉圓如細橘正青冬夏不凋其葉蔓延莖節著處則生根鬚包絡石上以此得名花白子黑正月採或云六月七月採莖葉日乾以石上生者良其在木上者隨木性而移薜荔木蓮地錦石血皆其類也薜荔與此極相類但莖葉龐大如藤狀近人用其葉治背癰乾末服之下利即愈木蓮更大如絡石其實若蓮房能狀陽道尤勝地錦葉如鴨掌蔓著地上隨節有根亦綠木石上石血極與絡石相類但葉

頭尖而赤耳

絡石草一名薜荔蔓生緣樹木生如蓮房姑蘇志

絡石性寒狀如薜荔莖小葉細蔓生石上附於牆者謂之  
牆薜荔可療熱瘡用雁山志

絡石曰石鯨曰石蹉曰略石曰明石曰領石曰懸石如薜  
荔而小絡石以生草沫畧

楚辭披薜荔兮帶女蘿注薜荔無根綠物而生不明言為  
何物據本草絡石也在石曰石鯨在地曰地錦統叢木曰  
常春藤又曰龍鱗薜荔又曰扶芳藤今京師人家假山上  
種巴山虎是也又云凡木蔓生皆曰薜荔丹鉛摠錄

蒺藜

蒺藜藜也布地蔓生細葉子有三角狀如菱而小刺人生道上長安最饒人行多着木屐故易以據於蒺藜言所恃傷也七諫曰江離棄於窮巷兮蒺藜蔓乎東廂瑞應圖云王者任用賢良則梧桐生於東廂今蒺藜生之以見所任之非人趙簡子曰夫植桃李者夏得其休息秋得其食焉植蒺藜者夏不得休息秋得其刺焉以言楊虎所植之非人與七諫義同詩墻有茨言衛公子頑國人疾之而不可道蓋蒺藜可惡依墻以生欲掃去之則恐傷墻以喻公子頑雖可疾欲道之則恐傷國體今軍旅亦以鈇作蒺以布

敵路謂之鉄蒺藜爾雅翼

蒺藜布地蔓生子有三角刺人狀如菱而小蒺之言疾也  
一名茨可以茨墻故謂之茨師曠曰歲欲旱旱草先生旱  
酒蒺藜也埤雅

園經曰蒺藜子生馮翊平澤或道傍七月八月採實暴乾  
又冬採黃白色類軍家鉄蒺藜比此詩所謂墻有茨者郭  
璞注爾雅云布地蔓生細葉子有三角刺人是也又一種  
白蒺藜今生同州沙苑牧馬草地最多而近道亦有之綠  
葉細蔓綿布沙上七月開花黃紫色如豌豆花而小九月  
結實作莢子便可採其實味甘而微腥褐綠色與蠶種子

相類而差大又與馬藻子酷相類但馬藻子微大不堪入藥須細辨之

蒺藜曰旁通曰屈人曰止行曰付羽曰升推曰即藜曰茨故爾雅謂茨蒺藜詩謂牆有茨也其實有芒刺行軍之家以鉄象之而布地焉又有白蒺藜者同名而異實草木畧爾雅曰茨蒺藜註布地蔓生細葉子有三角刺人見詩疏茨一名蒺藜郭云云者按詩小雅云楚者茨是也

黃耆

圖經曰黃耆生蜀郡山谷白水漢中今河東陝西州郡多有之根長二三尺已來獨莖作葉生枝幹去地二三寸其葉扶踈作羊齒狀又如蒺藜苗七月中開黃紫花其實作莢子長寸許八月中採根用其皮折之如綿謂之綿黃耆然有數種有白水耆有赤水耆有木耆功用並同而力不及白水耆木耆短而理橫今人多以茵菴根假作黃耆折皮亦似綿頗能亂真但茵菴根堅而脆黃耆至柔韌皮微黃褐色肉中白色以為異耳唐許齊宗初仕陳為新蔡王外兵參軍時柳太后感風不能言脉沈而口噤齊宗曰既

不能下藥宜湯氣熏之藥入腠理周時可差乃造黃耆防  
風湯數斛置於牀下氣如烟霧其夕便得語藥力熏蒸其  
效如此因附着之使善醫者知所取法焉

黃耆有白水耆赤水耆木耆三種其莖葉曰戴糝曰戴椹  
曰芟草曰蜀脂曰百本曰玉孫草木畧

肉蓯蓉

圖經曰肉蓯蓉生河西山谷及代郡鴈門今陝西州郡多有之然不及西羌界中耒者肉厚而力緊舊說是野馬遺落地所生今西人云大木間及土墜垣中多生此非游北之所而乃有則知自有種類耳或疑其初生於馬漚後乃漚殖如茜根生於人血之類是也皮如松子有鱗甲苗下有一細扁根長尺餘三月採根採時掘取中央好者以繩穿陰乾至八月乃堪用本經云五月五日採五月恐已老不堪故多三月採之西人多用作食品噉之刮去鱗甲以酒淨洗去黑汁薄切合山芋羊肉作羹極美好益人食之

勝服補藥又有一種草蓯蓉極相類但根莖圓紫色北  
來人多取刮去花壓令扁以代肉者功力殊劣耳又下品  
有例當條云生山南巖石上如藕根初生掘取陰乾亦名  
草蓯蓉性溫補男子疑即是此物今人鮮用故少有辨之  
者因附見於此

瑣陽代肉蓯蓉用味甘氣平煮粥可食補陰氣大便虛而  
燥者可用蓋肉蓯蓉難得真者多是金連根以鹽淹為之  
北方有草蓯蓉名曰列當稍性味醜實難倚仗此說得之  
于羅太無先生 丹溪本草

肉蓯蓉曰肉松容舊曰馬精化為蓯蓉人血化為茹蘆故

從蓉生於沙中在西方多馬處然亦有生於大木間及土  
塹上者草木畧

蒲黃

圖經曰蒲黃生河東池澤香蒲蒲黃苗也生南海池澤今處處有之而泰州者為良春初生嫩葉未出水時紅白色茸茸然周禮以為菹謂其始生取其中心大地入如之柄白色生噉之其脆以苦酒浸如食笋大美亦可以為鮮今人罕復有食者至夏抽梗於叢葉中花抱梗端如武士捧杵故俚俗謂蒲槌亦謂之蒲釐花黃即花中藥屑也細若金粉當其欲開時有便取之市廛間亦採以密搜作果食貨賣甚益小兒醫家又取其粉下篩後有赤滓謂之蒲萐入藥以澁腸已洩殊勝

蒲黃處：有即蒲槌中黃粉也。今京師謂槌為蒲棒，初得細羅取葶，別貯以備他用。將蒲黃水調為膏，擘為塊，人多食之以解心藏虛熱。小兒尤嗜，涉月則燥，色味皆淡，須蜜水，和然不可多食，令人自利不益，極虛人銜義。

蒲黃，陂澤繁生，味甘平，無毒，利小便，止血消瘀，血久服輕身，益氣力。松江府志。

香蒲

香蒲味甘平無毒主五臟心下邪氣口中爛嗅堅齒明目  
聰耳久服輕身耐老一名睢一名醮生南海池澤陶隱居  
云方藥不復用俗人無採彼土人亦不復識者江南貢菁  
茅一名香茅以供宗廟縮酒或云是薰草又云是鷺麥此  
蒲亦相類爾唐本注云此即其蒲作薦者春初生用白為  
菹亦堪蒸食山南名此蒲為香蒲謂菖蒲為臭蒲陶隱居  
所引菁茅乃三脊茅也其鷺麥薰草香茅野俗皆識都不  
為類此並非例也蒲黃即此香蒲花是也

續斷

園經曰續斷生常山山谷今陝西河中興元府舒越晉州亦有之三月已後生苗幹四稜似芋蔴葉亦類之兩兩相對而生四月開花紅白色似益母花根如大薊赤黃色七月八月採謹按范汪方云續斷即是馬薊與小薊菜相似但大於小薊耳葉似芩翁菜耳小厚兩邊有刺刺人其花紫色與今越州生者相類而市之貨者亦有數種少能辨其麤良醫人用之但以節：斷皮黃皺者為真

續斷曰龍豆曰屬折曰接骨曰南草曰槐曰大薊曰馬薊蜀本園經云莖方葉似芋花似益母根如大薊此北續斷

純白齋

也范汪云即馬薊也與小薊相似葉如芴翁菜兩邊有刺  
花紫會稽者正爾此南續斷也草木畧

漏蘆

園經曰漏蘆生喬山谷今京東州郡及秦海州皆有之  
舊說莖葉似白蒿有莢花黃生莢端莖若筋大其子作房  
類油麻房而小七八月後皆黑異於衆草今諸郡所圖上  
惟單州者差相類沂州者花葉頗似牡丹秦州者花似單  
葉寒菊紫色五七枝同一幹上海州者花紫碧如單葉蓮  
花花萼下及根傍有白茸裏之根黑色如蔓青而細又類  
蔥本淮南人呼為老翁花三州所上花雖別而葉頗相類  
但秦海州者葉更作鋸齒狀耳一物而殊類若此醫家何  
所適從當依舊說以單州出者為勝六月七月採莖苗日

乾八月採根陰乾南方用苗北土多用根又此下有飛廉  
條云生河內川澤一名漏蘆與苦苣相類惟葉下附莖有  
皮起似箭羽人多刻缺花紫色生平澤又有一種生山崗  
上葉頗相似而無疏缺且多毛莖亦無羽相直下更傍枝  
生則肉白皮黑中有黑脉日乾則黑如玄參經云七月八  
月採花陰乾用蘇恭云用莖葉及療痔蝕殺虫有驗據此  
所說與秦州海州所謂漏蘆者花葉及根頗相近然彼人  
但謂之漏蘆今醫家罕有用飛廉者既未的識故不復分  
別但附其說於下

漏蘆曰野蘭而飛廉曰漏蘆亦能相紊

草木畧

天名精

圖經曰天名精生平原川澤今江湖間皆有之夏秋抽條頗如薄荷花紫白色葉如菘菜而小故南人謂之地菘香氣似蘭故名蟾蜍蘭狀如藍故名蝦蟆藍其味甘辛故名麥句薑一名承首爾雅所謂葍音蕓藟承首是也江東人用此煨蠶蛹五月採此草既名地菘下品又有地菘條天名精出青州味甘寒無毒一名麥句薑一名蝦蟆藍一名承首一名玉門精一名羸顛一名蟾蜍藍一名覲劉禹錫云地菘也夏秋抽條似薄荷花紫白色味辛香山東通志爾雅葍藟承首呂氏春秋云豨首生而麥無葉神農本草

經云夏至之日承首菜萸先生承首圖經藥錄謂之天名  
精一名天蔓菁各精即蔓菁轉語也又名蟾蜍蘭今俗稱  
蒼是也又蘇實亦名承首即月令所謂荔挺也以冬至生  
與此同名異物丹鉛續錄

地菘即天名精也世人既不識天名精又妄認地菘為火  
蕪本草又出鶴虱一條都成紛亂今按地菘即天名精也  
蓋其葉似菘又似名精名精即故有二名鶴虱即其實也  
世間有單服火蕪法乃是服地菘耳不當用火蕪火蕪本  
草名豨蕪即是猪膏苗後人不識亦重復出之筆談

天名精一曰鹿活草昔青州劉愷宋元嘉中射一鹿剖五

臟以此草塞之蹶然而起愴怪而按草復倒如此三度愴  
密錄此草種之多主傷折俗呼為劉愴草酉陽雜俎

地菘一名天門精又名蟾蜍蘭夏秋抽條頭如薄荷花紫  
白色葉似菘葉而小爾雅所謂蒟藿豕首者是也昆陵志  
天名精曰麥勾薑曰蝦蟆藍曰豕首曰天門精曰羸顛曰  
蟾蜍蘭曰覲曰蒟藿曰豨首曰天蔓精曰鹿活草曰劉愴  
草爾雅云蒟藿豕首俗曰豨菴又曰火欬又云地菘異苑  
云宋元嘉青州劉愴射中一麀既破五臟以此草塞之蹶  
然而起去之則仆如此者三是以知其治折傷故其草得  
劉愴之名草木畧

爾雅荊蕀承首註本草曰羸顧一名蟾蜍蘭今江東呼  
首可以煨蠶蛹疏荊蕀藥草名一名承首一名羸顧一名  
蟾蜍蘭一名天名精一名麥勾薑一名蝦蟆藍一名天門  
精一名玉門精別錄一名天蔓精南人名為地菘味其辛  
故有薑稱狀如藍故名蝦蟆藍香似蘭故名蟾蜍蘭三蒼  
云煨熬也

丹參

圖經曰丹參生桐柏山川谷及泰山今陝西河東州郡及隨州亦有之二月生苗高一尺許莖幹方稜青色葉生相對如薄荷而有毛三月開花紅紫色似蘇花根赤大如指長一尺餘一苗數根五月採暴乾又云冬月採者良夏月採者虛惡

丹參葉如薄荷花如蘇曰却蟬草曰赤參曰木羊乳曰山苓本蟬曰奔馬俗謂之逐馬言驅風之駛也草木畧

飛廉

飛廉味苦平無毒主骨節熱脛重酸疼頭眩頂重皮間邪風如蜂螫針刺魚子細起熱瘡癰疽痔濕痺止風邪欬嗽下乳汁久服令人身輕益氣明目不老可煮可乾一名漏蘆一名天薺一名伏猪一名飛輕一名伏菟一名飛雉一名木末生河內川澤正月採根七月八月採花陰乾

今方家所用漏蘆乃飛廉也飛廉一名漏蘆苗似箬葉根如牛蒡綿頭者也採時用根今閩中所用漏蘆莖如油麻高六七寸秋深枯黑如漆採時用苗本草自有條正謂之

漏蘆 筆談

飛廉曰漏蘆曰天薺曰伏豬曰飛輕曰伏兔曰飛雉曰木  
禾似苔矣而葉下附莖有皮起似箭羽刻缺草木畧

五味子

十月種五味子取根種者當年就旺子種者二月種之次年方旺如豇豆法搭架神隱

味莖猪階運郭氏以為五味今五味子是也皮肉甘酸核中辛苦都有鹹味味既具矣故其字從味且能兼養五臟也典術曰五味者五行之精仙人羨門子服之而本草直云味酸者木以酸為主又所出不同亦各偏勝如高麗者多肉而酸甘出青冀者過酸出建平者味苦不害其兼有五味也其莖赤斑花黃白生青熟紫亦具有五色聖賢家墓記曰孔子墓上有五味木爾雅翼

春初引赤蔓於高木葉尖圓似杏葉三四月開黃白花類  
小蓮花七月成實如豌豆大生青熟紅紫色八閩通志

圖經曰五味子生齊山山谷及代郡今河東陝西州郡尤  
多而杭越間亦有春初生苗引赤蔓於高木其長六七尺  
葉尖圓似杏葉三四月開黃白花類小蓮花七月成實如  
豌豆許大生青熟紅紫爾雅云葇菹註云五味也蔓生  
子叢莖端疏云一名葇一名莖菹今有數種大抵相近而  
以味甘者為佳八月採陰乾用一說小顆皮皺泡者有白  
色鹽霜一重其味酸醜苦辛其味全者真也千金月令五  
月宜服五味湯取五味子一大合以木杵臼細搗之置小

甕瓶中以百沸湯投之入少蜜即密封頭置火邊良久湯成堪飲

五味子土人多取作蜜煎以點湯及充菓品邵武府志

五味子曰葇曰葇蔕故爾雅云葇蔕蔕引蔓實如珠而赤草木畧

爾雅葇蔕蔕註五味也蔓生子叢在莖頭疏藥草也一名葇一名葇蔕按本草五味子一名會及一名玄及唐本註云五味皮肉其酸核中辛苦都有醜味此則五味具也其葉似杏而大蔓生木上子作房如落葵大如蓂子

旋花 卽鼓子花

圖經曰旋花生豫州平澤今處：皆有之蘇恭云此卽平澤所生旋菑是也其根似筋故一名筋根別錄云根主續筋故南人皆呼為續筋根苗作叢蔓葉似山芋而狹長花白夏秋生遍野根無毛節蒸煮堪噉甚其美五月採花陰乾二月八月採根曰乾花今不見用者下品有旋復花與此殊別人疑其相近殊無謂也救急方續斷筋法取旋菑草根淨洗去土搗量瘡大小傳之日一二易之乃差止一名肥膈草俗謂鼓子花也黔南出一種旋花麗莖大葉無花不作蔓恐別是一物也

衍義曰旋花蔓生今河北京西關陝田野中甚多最難鋤  
艾治之又生世又謂之鼓子花言其形肖也四五月開花  
亦有多葉者其根寸截置土下潮灌溉方涉旬苗已生獨  
本圖經是矣

旋花曰鼓子花曰筋根花曰金沸曰美草曰肥腸草蔓生  
花不作瓣故謂之旋也此草一名金沸而旋覆花亦名金  
沸旋花正謂之蓄旋旋覆正謂旋復易相紊也然方家所  
用者蓄旋用根旋復用花草木畧

筋斷復續者取旋復根絞取汁以筋相對取汁塗而封之  
即相續如故蜀兒如逃走多刻筋以此續之百不失一

洵按醫說所云旋復卽旋花也非旋復也今為改正

忍冬

金銀花本地有之宋志云一曰金釵股一曰忍冬花一曰老翁鬚莆人以其花一黃一白相間故謂之金銀花治腫毒最效興化府志

忍冬花藤生繞覆草木上苗莖赤紫色葉上下微有毛花黃白相間凌冬不凋俗名金銀花又名金釵股又名老翁鬚八閩通志

予族子相少服菟絲子凡數年所服至多飲食倍常血氣充盛忽因浴去背垢者告以背腫急視之隨視隨長赤爛異常蓋大疽也適四五月間金銀藤開花時乃大取依良

方所載法飲之兩日至數斤背腫消盡以此知非獨金石

不可妄服兔絲過餌亦能作疽如此不可不戒

老學菴筆記

金銀花性涼能解熱毒土人用以作湯治諸瘡花初開時  
黃色後轉白色故名金銀花藤有汁而茸謂之啜密藤雁

山志

忍冬藤即金銀藤一名金釵股老翁鬚左纏藤林薄籬落  
間有之集驗方凡癰疽發背初發時取葉一大把爛研以  
酒和得所圍之仍以藤葉五兩大甘草一两剉碎入沙鉢  
以水二碗慢煎至一碗入魚灰酒一碗再煎十餘沸去滓  
分三次溫服甚者一晝夜進兩劑至大小便通無不瘥者

凡製藥無犯鉄器松江府志

崇寧間蘇州天平山白雲寺五僧行山間得簞一叢甚大  
摘而煮食之至夜發吐三人急採鴛鴦草生啖遂愈二人  
不甚肯啖吐至死此草藤蔓而生對開黃白花傍水依山  
處皆有之治癰疽腫毒尤妙或服或傳皆可今人謂之金  
銀花又曰老翁鬚本草名忍冬醫說出已志

蛇床子

圖經曰蛇床子生臨淄川谷及田野今處：有之而揚州  
襄州者勝三月生苗高三二尺葉青碎作叢似蒿枝每枝  
上有花頭百餘結同一窠似馬芹類四五月開白花又似  
散水子黃搗色如黍米至輕虛五月採實陰乾爾雅謂之  
旰一名虺床

蛇床子生太湖旁姑蘇志

蛇床子一名馬床葉似芎藭花白子如黍粒黃白色生下  
濕地爾雅云旰虺床毘陵志

蛇床曰蛇粟曰蛇米曰虺床曰思益曰繩毒曰車棘曰牆

靡曰盱曰馬床爾雅所謂盱毼床也花白子如黍粒葉似芎藭而細亦香故有牆靡之名焉草木畧

爾雅曰盱毼床註蛇床也一名馬床廣雅云疏盱一名毼床按本草蛇床一名蛇米一名毼牀一名思益一名繩毒一名寒棘一名牆靡陶注云近道田野墟落間甚多花葉似靡蕪

地膚子

圖經曰地膚子生荆川平澤及田野今蜀川關中近地皆有之初生薄地五六寸根形如蒿莖赤葉青大似荆芥三月開黃白花八月九月採實陰乾用神仙七精散云地膚子星之精也或曰其苗即獨掃也一名鴨舌草陶隱居謂莖苗可為掃帚者蘇恭云苗極弱不能勝舉二說不同而今醫家便以為獨掃是也密州所上者其說益名云根作叢生每窠有二三十莖莖有赤有黃七月開黃花其實地膚也至八月而蘗蘗成可採正與此他獨掃相類若然恐西北所出者短弱故蘇注云爾其葉味苦寒無毒主大腸

洩瀉止赤白痢和氣澁膈胃解惡瘡毒三四月五月採  
地膚曰地葵曰地麥曰益明曰落帚子曰鴨舌即獨帚也  
亦曰地掃爾雅云并馬帚即此也今人亦用為帚草木畧

景天即戒火草

陶隱居云今人皆盆盛養之於屋上云以辟火葉可療金瘡止血以洗浴小兒去煩熱驚氣廣州城外有一樹云大三四圍呼為慎火樹江東者甚細小方用亦掃其花入服食衆藥之名此最為嚴今按皇朝收復嶺表得廣州醫官問其事曾無慎火成樹者蓋陶之誤爾

圖經曰景天生泰山山谷今南北皆有之人家多種於中庭或以盆盛植於屋上云以辟火謂之慎花草春生苗葉似馬齒而大作層而上莖極脆弱夏中開紅紫碎花秋後枯死亦有宿根者四月四日七月七日採其花并苗葉陰

乾

衍義曰景天陶隱居既云今人皆盆盛養之於屋上即知是草藥又言廣州城外有一株云可三四圍呼為慎火木既曰云即非親見也蓋是傳聞亦非誤耳乃陶之輕聽也然極易種但折生枝置土中頻澆溉旬日便下根

人家用瓦缶植之云以警火八閩通志

景天曰戒火曰火母曰救火曰據火曰慎火今人皆謂之慎火草植弱而葉嫩種之階庭能辟火草木畧

茵陳

春生苗秋枯經冬不死春復因舊苗生新葉故名茵陳又

一種大葉者曰山茵陳

八閩通志  
福州

圖經曰茵陳蒿生泰山及丘陵坡岸上今近道皆有之而不及泰山者佳春初生苗蒿三五寸似蓬蒿而葉緊細無花實秋後葉枯莖幹經冬不死至春更因舊苗而生新葉故名茵陳蒿五月七月採莖葉陰乾今謂之山茵陳江寧府又有一種茵陳葉大根麁黃白色至夏有花實階州有一種名白蒿亦似青蒿而背白本土皆通入藥用之今南方醫人用山茵陳乃有數種或著其說云山茵陳京下及

北地用者如艾蒿葉細而背白其氣亦如艾味苦乾則色黑江南所用莖葉都似家茵陳而大高三四尺氣極芬香味甘辛俗又名龍腦薄苛吳中所用乃石香葉也葉至細色黃味辛甚香烈性溫誤作解脾藥服之大令人煩以本草論之但有茵陳蒿而無山茵陳本草注云茵陳蒿葉似蓬而緊細今京下北地用為山茵陳者是也大體世方用山茵陳療腦痛解傷寒發汗行肢節滯氣化痰利膈治勞倦最要詳本草正經惟療黃疸利小便與世方都不應今試取京下所用山茵陳為解肌發汗藥灼然少效江南山茵陳療傷寒腦痛絕勝此見諸醫議論謂家茵陳亦能解

肌下膈去背中煩方家少用但可研作飯服之本草所無  
自出俗方茵陳蒿復當別是一物主療自異不得為山茵  
陳此說亦未可據但以功較之則江南者為勝以經言之  
則非本草所出醫方所用且可計較功效本草之義更當  
考論爾

茵陳有二種大葉者曰山茵陳春生苗秋枯冬不死因舊  
苗生葉故曰茵陳漳州府志

茵陳蒿南人所用者似香薷北人所用者似青蒿即白蒿  
也南北所用俱有山茵陳之名同名異實又有石香薷亦  
名山茵陳而香薷亦名茵陳四種足相紊也 草木畧

沙參

圖經曰沙參生河內川谷及宛句般陽續山今出淄齊潞  
隨州而江淮荊湖州郡或有之苗長一二尺以耒叢生崖  
碧間葉似枸杞而有叉牙七月開紫花根如葵根筋許大  
赤黃色中正白實者佳二月八月採根暴乾而土生者葉  
有細有大花白瓣上仍有白粘膠此為小異

沙參葉如枸杞根如葵曰苦心曰志取曰虎頭曰白參曰  
識美曰文希亦曰知母而得五參之名草木畧

白兔藿

白兔藿味苦平無毒主蛇虺蜂蠆狗菜肉蠱毒鬼疰風  
疰諸大毒不可入口者皆消除之又去血可末着痛上立  
消毒入腹者煮飲之即解一名白葛生交州山谷陶隱居  
云此藥療毒莫之與敵而人不復用殊不可解都不聞有  
識之者想當似葛爾須別廣訪交州人未得委悉唐本注  
云此草荆襄間山谷大有苗似蘿摩葉圓厚莖俱白毛與  
衆草異蔓生山南俗謂之白葛用療毒有效而交廣又有  
白花藤生葉似女貞莖葉俱無毛花白根似野葛云大療  
毒而交州用根不用苗則非藿也用葉苗者真矣二物療

治病如經說各自一物下條載白花藤也臣禹錫等謹按  
蜀本圖經云蔓生葉圓若萼今襄州北汝州南崗上有五  
月六月採苗日乾

白兔藿曰白葛蔓生葉圓如萼草木畧

徐長卿

圖經曰徐長卿生泰山山嵒谷及隴西今淄齊淮泗間亦有之三月生青苗葉似小桑兩：相當而有光潤也七八月著子似蘿摩而小九月苗黃十月而枯根黃色似細辛微麤長有臊氣三月四月採一名別仙蹤

徐長卿曰別仙蹤曰鬼督郵苗如小麥子似蘿摩草木畧

薇銜

薇銜味苦平微寒無毒主風濕痺歷節痛驚癇吐舌悸氣  
賊風鼠癘癰腫暴癩逐水療痿瘳久服輕身明目一名縻  
銜一名承膏一名承肌一名無心一名丘顛生漢中川澤  
及宛句邯鄲七月採莖葉陰乾得秦皮良陶隱居云俗用  
亦少唐本注云此草叢生似荒蔚及白頭翁其葉有毛莖  
赤療賊風大效南人謂之吳風草一名鹿銜草言鹿有疾  
銜此草差又有大小一種楚人猶謂大者為大吳風草小  
者為小吳風草也今按陳藏器本草云婦人服之絕產無  
子臣禹錫等謹按蜀本圖經云葉似荒蔚叢生有毛黃花

根赤黑也

薇銜曰承膏曰承肌曰無心曰無顛曰鹿銜曰吳風草葉  
似芫蔚叢生有毛草木畧

雲實

雲實味辛苦溫無毒主洩痢腸癖殺蟲蠱毒去邪惡結氣止痛除寒熱消渴花主見鬼精物多食令人狂走殺精物下水燒之致鬼久服輕身通神明益壽一名員實一名云英一名天豆生河間川谷十月採暴乾陶隱居云今處有之子細如葶藶子而小黑其實亦類葶藶燒之致鬼未見其法術唐本注云

圖經曰雲實生河間川谷高五六尺葉如槐而狹長枝上有刺苗名臭草又名羊石子草花黃白色實若麻子大黃黑色俗名馬豆十月採暴乾用今三月四月採苗五月六

月採實實過時即枯落治瘡藥中多用之

雲實曰員實曰雲英曰天豆曰馬豆曰臭草曰羊石子葉  
如首蓿花黃白莢如大豆實若大麻能殺精物燒之致鬼  
草木畧

王不留行

圖經曰王不留行生泰山山谷今江浙及並河近處皆有之苗莖俱青高七八寸已耒根黃色如薺根葉尖如小匙頭亦有似槐葉者四月開花黃紫色隨莖而生如松子狀又似猪藍花五月內採苗莖曬乾用俗間亦謂之剪金草河北生者葉圓花紅與此小別

葉似酸漿子似菘子圖經云今江浙近河處皆有之

鎮江

府志

王不留行曰禁宮花曰剪金花葉似槐實作房

草木畧

鬼督郵

鬼督郵味辛苦平無毒主鬼疰卒忤中惡心腹邪氣百精  
毒溫瘧疫疾強腰脚益腎力一名獨搖草唐本注云苗惟  
一莖端若繖音傘根如牛膝而細黑所在有之有必叢生  
今人以徐長卿代之非也唐本先附臣禹錫等謹按蜀本  
云徐長卿赤箭之類亦一名為鬼督郵但主治不同宜審  
用也又圖經云莖似細箭幹高二尺已下葉生莖端狀繖  
蓋根橫而不生鬚花生葉心黃色二月八月採根所在皆  
有

鬼督郵曰獨搖草莖如箭幹葉如繖蓋花生葉心根橫而

不生鬚徐長卿赤箭俱有鬼督郵之名而實異草木畧

### 白花藤

白花藤味苦寒無毒主解諸藥菜肉中毒酒漬服之主虛勞風熱生嶺南交州廣州平澤唐本注云苗似野葛而白花根皮厚肉白其骨柔於野葛唐本先附臣禹錫等謹按蜀本圖經云葉有細毛蔓生花白根似牡丹骨柔皮白而厚味苦用根不用苗凌冬不凋

地不容

圖經曰地不容生戎州味苦大寒無毒蔓生葉青如杏葉而太厚硬凌冬不凋無實根黃白色外皮微麤揭累：相連如藥實而圓大採無時主解蠱毒碎瘴氣治咽喉閉塞鄉人亦呼為解毒子

留軍待

留軍待味辛溫無毒主肢節風痛筋脉不遂折傷瘀血五緩擊痛生劔州山谷其葉似楠木而細長採無時

獨用將軍

獨用將軍味辛無毒主治毒腫妳癰解毒破惡血生林野  
採無時節：穿葉心生苗其葉似楠根並採用

山胡椒

山胡椒味辛大熱無毒主心腹痛中冷破滯所在有之似  
胡椒顆粒大如黑豆其色黑俗用有效

燈籠草

燈籠草味苦無毒主上氣咳嗽風熱明目所在有之八月採枝幹高三四尺有纏紅色狀若燈籠內有子紅色可愛根莖花實並入藥使

人肝藤

人肝藤主解諸毒藥腫遊風脚手軟痺並研服之亦煮服之亦傳病上生嶺南葉三桠花紫色一名承露仙又有伏雞子亦承露仙世圖與此名同物異

越王餘筭

越王餘筭味鹹平無毒主下水破結氣生南海水中如竹筭子長尺許異苑曰晋安有越王餘筭葉白者似角云是越王行海作筭有餘棄於水中而生

越王餘筭生南海水中如竹筭子長尺許異苑云越王行海作筭有餘棄於水中而生草木畧

石蓴

石蓴味甘平無毒下水利小便生南海中水石上南越志云似紫菜色青臨海異物志曰附石生也

海根

海根味苦小温無毒主霍亂中惡心腹痛鬼氣注忤飛尸喉痺蠱毒癰疽惡腫赤白遊胗蛇咬犬毒酒及水磨服傳之亦佳生會稽海畔山谷莖赤葉似馬蓼根似菘萁而小也海人極用之

刺蜜

刺蜜味甘無毒主骨熱痰嗽痢暴下血開胃止渴除煩生  
交河沙中草頭有刺上有毛：中生蜜一名草蜜胡人叫  
為給敦羅

骨路支

骨路支味辛平無毒主上氣浮腫水氣嘔逆婦人崩中餘  
血癥瘕殺三蟲生崑崙國苗似凌霄藤根如青木香安南  
亦有一名飛滕

長松

朱少章曲洧舊聞云齊州釋普明寓五臺山脫得風疾眉  
髮俱脫手足腐爛哀號苦楚人不忍聞忽遇異人教服長  
松僧不能識復告之曰長松生古松下取其根餌之皮色  
如薺芘長三五寸味微苦類人參清香可愛僧採服之不  
旬日毛髮俱生顏貌如故惜乎今之有風疾者未之服也  
按本草陳藏器云長松味甘溫無毒主風血冷氣宿疾溫  
中去風此草似松但葉上有脂產關內山谷中近韓悉醫  
通云長松產於太行西北諸山似獨活而香三說未知孰

是續醫說

長松產五臺山治大風有殊效世人所不知也文殊指以示癩僧僧如其所教其患即愈自此名著於清涼傳而本草未之載也曲洧舊聞

按此即朱少章語其畧如此續醫說引之乃最詳豈今刻經人筆削耶至云本草未載今所載者乃陳藏器附錄非本草經也

長松味甘溫無毒主風血冷氣宿疾溫中去風草似松葉上有脂山人服之生關內山谷中本草

合子草

合子草有小毒子及葉主蠱毒螫咬擣傳瘡上蔓生岸傍  
葉尖花白子中有兩片如合子

草部中品之上

葉耳實即卷葛根

牯樓即果贏

苦參

當歸

麻黃

蟲實

瞿麥

即今石竹花當見花部

玄參

秦花

音膠

知母

貝母

即玄

淫羊藿

黃芩

狗脊

石龍芮

前胡

敗醬

白鮮皮

酸漿

紫參

藁本

石帚

草薺

即冷飯團

白薇

菝葜

大青

石香薷

雙納香

風延母

耕香

大瓠藤水

筋子根

土羊

優殿

土落草

掉菜

必似勒

胡面莽

海蘊

百丈青

研合子

獨自草

金釵股

博落回

毛建草

數低

仰盆

離鬲草

盧藥

藁耳實即蒼耳

蒼耳本草作藁耳即詩所謂卷耳也一名羊負來志

閩通

福州

卷耳菜名也幽冀謂之檀菜雒下謂之胡藁江東呼為常  
藁葉青白色似胡荽白葉細莖可葺為茹滑而少味又謂  
之常思菜僮人皆食之又以其葉覆麴作黃衣崔寔四民  
月令曰伏後二十日為麴至七月七日干之覆以胡藁故  
古人采之其實如鼠耳而蒼色上多刺好着人衣今人通  
謂之蒼耳其一各苑離騷以譬小人所謂藟藟施以盈室  
是也一名羊負來博物志曰洛中有人入蜀胡藁着羊毛

純白齋

蜀人種之曰羊負來也陶隱居乃云昔中國無此言從外國逐羊毛中未據此物既稱胡象必是胡物但國風爾雅所載則其來已久而羊負來之名僅出後代則此名恐言自洛入蜀者得之亦卷耳野中所多日夕羊下多負以歸耳爾雅翼

爾雅曰卷耳蒼耳廣雅曰即象耳也幽州人謂之爵耳或曰形如鼠耳故有耳之號也或曰白華細莖子如婦人耳瑞故各云荆楚記曰卷耳一名瑞草亦云蒼耳叢生如盤今人以葉覆麥作黃衣者所在有之詩曰采采卷耳不盈頃筐舊說千歲之龜巢於蓮葉游於卷耳之上埤雅

圖經曰葇耳生安陸川谷及六安田野今處：有之謹按  
詩人謂之蒼耳爾雅謂之蒼耳廣雅謂之葇耳皆以實得  
名也陸機疏云葉青白似胡荽白葉細莖蔓生可煮為茹  
滑而少味四月中生子正如婦人耳瑤草鄭棗成謂是白  
胡荽幽州人呼為爵耳郭璞云形似鼠耳叢生如盤今之  
所有皆類此但不作蔓生耳或曰此物本生蜀中其實多  
刺因羊過之毛中粘綴遂至中國故名羊負耒俗呼為道  
人頭實熟時採之

蒼耳子苗高三二尺莖青黃色上有斑點葉微似葡萄葉  
而小子多刺

邵武府志

蒼耳莆人多端午日採之作湯澡浴謂可以理風

興化府志

藁耳曰苓耳曰羊負来曰唱起草曰白胡荽江東曰常泉  
幽州曰爵耳爾雅曰卷耳苓耳舊說即蒼耳也其實似鼠  
耳而有澁刺易黏人衣中原本無此草因羊自蜀来其實  
帶毛而至故有羊負来之名然詩云采：卷耳以其可茹  
也即今卷菜葉如連錢者是也若蒼耳但堪入藥不可食  
草木畧

爾雅曰卷耳苓耳注廣雅云藁耳也亦云胡泉江東呼為  
常泉或曰苓耳形似鼠耳叢生如盤疏卷耳一名苓耳詩  
周南云采：卷耳陸機疏云葉青白色似胡荽白華細莖

蔓生可煮為茹滑而少味四月中生子如婦人耳瑤幽州  
謂之爵耳是也

博物志洛中有驅羊入蜀胡蔥子著羊毛蜀人取種因名  
羊負來

括樓

括樓詩云果羸之實爾雅云天瓜本草云地樓蔓生花淺黃色實在花下亦名黃瓜方家攘其根作粉入劑閩通

天花粉即瓜萎根姑蘇志

圖經曰括樓生洪農山谷及山陰地今所在有之實名黃瓜詩所謂果羸之實是也根亦名白藥皮黃肉白三四月內生苗引藤蔓葉如甜瓜葉作叉有細毛七月開花似葫蘆花淺黃色實在花下大如拳生青至九月熟赤黃色二月八月採根刮去皮曝乾三十日成其實有正圓者有銳而長者功用皆同其根惟歲久入土深者佳鹵地生者有

毒謹按栝樓主消渴古方亦單用之孫思邈作粉法深掘  
大根厚削皮至白處寸切之水浸一日一易水經五日取  
出爛搗研以絹袋盛之澄濾令極細如粉去水服方寸一  
日三四服亦可作粉粥乳酪中食之並宜

瓜蒞韓昌黎詩謂之黃團

漳州府志

栝樓曰地樓曰果臝曰天瓜曰澤姑曰白藥其實曰黃瓜  
詩云果臝之實爾雅云果臝之實栝樓草木畧

爾雅曰果臝之實栝樓註今齊人呼之為天瓜疏果臝之  
草其實名栝樓實即子也故李巡云栝樓子名也郭云今  
齊人謂之天瓜本草云栝樓葉似瓜葉形兩相值蔓延

青黑色六月華七月實如瓜瓣是也

苦參

圖經曰苦參生汝南山谷及田野今近道處有之其根黃色長五七寸許枝麓細三五莖並生苗高三四尺已耒葉碎青色極似槐葉故有水槐名春生冷凋其花黃白七月結實如小豆子河北生者無花子五月六月八月十月採根暴乾用

苦參苗高三二尺許葉極似槐春生冬凋其花黃白七月結實作莢子如小豆根極苦一名地槐一名水槐八閩通志

子常苦腰重久坐則旅拒十餘步然後能行有一將佐見予曰得無用苦參潔齒否予時以病齒用苦參數年矣曰

此病由也苦參入齒其氣傷腎能使人腰重後有太常少  
卿舒昭亮用苦參揩齒歲久亦病腰自後悉不用苦參腰  
疾皆愈筆談

苦參曰水槐曰苦蕒曰地槐曰菟槐曰驕槐曰白莖曰虎  
麻曰岑莖曰祿白曰陵即草木畧

當歸

圖經曰當歸生隴西川谷今川蜀陝西諸郡及江寧府涪州皆有之以蜀中者為勝春生苗綠葉有三瓣七月開花似蒔蘿淺紫色根黑黃色二月八月採根陰乾然苗有兩種都類芎藭而葉有大小為異莖梗比芎藭甚卑下根亦二種大葉名馬尾當歸細葉名蠶頭當歸大抵以肉厚而不枯者為勝謹按爾雅云薺山薺古薺郭璞注引廣雅云山薺當歸也似薺而薺大釋曰說文云薺草也生山中者名薺一名山薺然則當歸薺類也在平地者名薺生山中而薺大者名當歸也

衍義曰當歸廣雅云山斲當歸也似芹而麓大說文云斲  
草也生山中者名薜音百新書圖經以謂當歸芹類也在  
平地者名芹生山中麓大者名當歸若然則今川蜀皆以  
平地作畦種尤肥好多脂肉不以平地山中為等差但肥  
潤不枯燥者佳今醫家用此一種為勝市人又以薄酒洒  
使肥潤不可不察也藥性論云補女子諸不足此說盡當  
歸之用也

當歸血中主藥也通肝經頭身稍分三治全用則活血若  
氣血昏迷者服之即定能使氣血各有所歸也故名之曰  
當歸其功用但從人參黃耆則能補血從大黃牽牛則能

破血從官桂附子茱萸則熱從大黃芒硝則寒此非無定性也奪於群衆之勢而不得不然耳譬如生薑人皆指以為熱殊不知薑備五色存皮則溫去皮則熱又如半夏之性能為君子能為小人者也近之醫者或治男婦血病往往禁用當歸書此以破其惑續醫說

薛曰山蘄曰白蘄曰乾歸曰文無爾雅謂薛山蘄又謂薛白蘄即當歸也葉似芍藥有兩種大葉者謂之馬尾當歸細葉者謂之蠶頭當歸此方家之別也草木畧

爾雅曰薛山蘄註曰廣雅曰山蘄當歸今似蘄而粗大疏曰說文云蘄草也生山中者一名薛一名山蘄色白者名

白蘄下文薛白蘄是也生平地即名蘄按廣雅張揖撰以  
廣爾雅之闕漏也曰山蘄當歸者言即今藥草當歸按本  
草當歸不言名蘄及山蘄是即以時驗而言也故郭云今  
似蘄而粗大言似平地蘄而差粗大耳

麻黃

圖經曰麻黃生晉地及河東今近京多有之以崇陽中牟者為勝苗春生至夏五月則長及一尺已耒稍上有黃花結實如百合瓣而小又似皂莢子味甜微有麻黃氣外紅皮裏仁子黑根紫赤色俗說有雌雄二種者於二月四月內開花六月內結子雄者無花不結子至立秋後採其莖陰乾令青

蠶實

園經曰蠶實馬蘭子也北人音訛呼為棟子生河東川谷  
今陝西諸郡及鼎澧州亦有之近京尤多葉似薤而長厚  
三月開紫碧花五月結實作角子如麻大而赤色有稜根  
細長通黃色人取以為刷三月採花五月採實並陰乾用  
謹按顏氏家訓云月令曰荔挺出鄭康成云荔挺馬薤也  
易統驗玄圖云荔挺不出則國多火災說文云荔似蒲而  
小根可為刷廣雅云馬薤荔也蔡邕高誘皆云荔似挺出  
然則鄭以荔挺為名誤矣此物河北平澤率生之江東頗  
多種於堦庭但呼為旱蒲故不識馬薤講禮者乃以為馬

竟且馬竟亦名豚耳俗曰馬齒者是也其花實皆入藥列  
仙傳寇先生者宋人也好種荔枝食其葩實焉今山人亦單  
服其實云大溫益下甚有奇効

衍義曰蟲實陶隱居云方藥不復用俗無識者本經諸家  
所主不相應若果是馬蘭則日華子不當更言亦可為蔬  
菜食蓋馬蘭其葉馬牛皆不食為謔出土葉已硬况又無  
味豈可更堪人食也今不敢以蟲實為馬蘭子更俟博識  
者

北方田野人患胸腹脹者取馬蓮花子擘碎涼水下即泄  
數行而愈此法可備途中倉卒無藥者之一助云

東日  
記

蠶實曰荔實曰劇草曰三堅曰承首曰馬薤即馬藟子也  
北人呼為馬棟子江東呼為旱蒲多植於堦庭說文云荔  
似蒲而小根可作刷月令云荔挺生草木畧

瞿麥

圖經曰瞿麥生泰山川谷今處有之苗高一尺以耒葉尖小青色根紫黑色形如細蔓菁花紅紫赤色赤似映山紅一月至五月開七月結實似穗子頗似麥故以名之立秋後合子葉收採陰乾用河陽河中府出者苗可用淮甸出者根細村民取作刷帚爾雅謂之大菊廣雅謂之芘姜是也

瞿麥一名雀麥一名燕麥莖生細葉花紅紫赤色劉禹錫所謂兔葵燕麥者是也 昆陵志

瞿麥曰巨句麥曰大菊曰大蘭曰芘姜曰杜母草曰燕麥

曰蕎麥曰雀麥曰石竹故爾雅云大菊瞿麥其葉細嫩花如錢可愛唐人多像此為衣服之飾所謂石竹繡羅衣草木畧

士洵按今之雀麥與石竹形質迥別鄭說非也後見息三竹譜云石竹一名瞿麥乃知石竹的是瞿麥但今云雀麥又是別草或非古名也

爾雅曰大菊蘧麥註一名麥句蘧即瞿麥疏大菊一名蘧麥藥草也廣雅云此萎麥句蘧蘧麥按本草云瞿麥一名巨句麥一名大菊一名大蘭陶注云今出近道一莖生細葉花紅紫赤可愛子頗似麥故名瞿麥

玄參

園經曰玄參生河間及寬甸今處：有之二月生苗葉似  
脂麻又如槐柳細莖青紫色七月開花青碧色八月結子  
黑色亦有白花莖方大紫赤色而有細毛有節若竹者高  
五六尺葉如掌大而尖長如鋸齒其根尖長生青白乾即  
紫黑新者潤膩一根可生五七枚三月八月九月採暴乾  
或云蒸過日乾陶隱居云道家時用合香今人有傳其法  
以玄參其松香各杵末均秤分兩盛以大酒瓶中投白蜜  
漬令瓶七八分緊封繫頭安釜中煮不住火一伏時止火  
候冷破瓶取出再搗熟如乾更用熟蜜和瓷器盛瘞埋地

中旋取使入龍腦搜亦可以熏衣

玄參莖似人參而長紫赤色葉如掌根黑有微香毘陵志  
玄參曰重臺曰玄臺曰鹿腸曰正馬曰咸曰端曰逐馬曰  
馥草草木畧

秦艸

圖經曰秦艸生飛鳥山谷今河陝州郡多有之根土黃色而相交糾長一尺已耒麤細不等枝幹高五六寸葉婆婆連莖梗俱青色如萵苣葉六月中開花紫色似葛花當月結子每於春秋採陰乾

知母

圖經曰知母生河內川谷今瀕河諸郡及解州滁州亦有之根黃色似菖蒲而柔潤葉至難死掘出隨生須燥乃止四月開青花如韭花八月結實二月八月採根暴乾用尔雅謂之薺又謂之莖藩是也

知母曰蚘母曰連母曰野蓼曰地參曰水參曰水浚曰貨母曰蜈母曰女雷曰女理曰兒草曰鹿列曰韭蓬曰兒躑草曰東根曰水須曰莖藩曰薺曰昌支爾雅曰薺莖藩草

木畧

爾雅曰薺莖藩註生山上葉如韭一曰蜈母莖藥草知母

也一名薺一名菴蒲按本草此名之外更有十餘名文多  
不載陶注云形似菴蒲而柔潤葉至難死掘出隨生須枯  
燥乃止也

貝母

圖經曰貝母生晉地今河中江陝府郢壽隨鄭蔡潤滁州皆有之根有瓣子黃白色如聚貝子故名貝母二月生苗莖細青色葉亦青似蕎麥葉隨苗出七月開花碧綠色形如鼓子花八月採根曬乾又云四月蒜熟時採之良此有數種鄜詩言採其商音商陸機疏云貝母也其葉如栝樓而細小其子在根下如羊子正白四方連累相著有分解今近道出者正類此郭璞注爾雅云白花葉似韭此種罕復見之此藥亦治惡瘡唐人記其事云江左嘗有商人左膊上有瘡類人面亦無它苦商人戲滴酒口中其面亦赤

色以物食之亦能食食多則覺臍內肉脹起或不食之則  
二臂痺有善醫者教其歷試諸藥金石草木之類悉試之  
無苦至貝母其瘡乃聚眉閉口商人喜曰此藥可治也因  
以小葦筒毀其口灌之數日成痂遂愈然不知何疾也謹  
按本經主金瘡此豈金瘡之類歟

貝母一名商草根有瓣子黃白色如聚貝子故名貝母爾  
雅云根如小貝圓而白花葉似韭此種罕復見之 毘陵志  
貝母曰空草曰藥實曰苦花曰苦菜曰商草曰勤母曰商  
爾雅曰商貝母詩云言采其莖 草木畧

爾雅曰商貝母 商音 註根如小貝圓而白華葉似韭 疏藥

草貝母一名蔞詩鄘風載馳云陟彼阿丘言采其蔞陸機  
疏云蔞今貝母也其葉如枯接而細小其子在根下如芋  
子正白四方連累相著有分解也本草一名空草陶註云  
出近道形似聚貝子故云貝母是也

淫羊藿

圖經曰淫羊藿俗名仙靈脾生上郡陽山山谷今江東陝西泰山漢中湖湘間皆有之葉青似杏葉上有刺莖如栗桿根紫色有鬚四月開花白色亦有紫色碎小獨豆子五月採葉曬乾湖湘出者葉如小頭枝莖緊細經冬不凋根似黃蓮關中俗呼三枝九葉草苗高一二尺許根葉俱任使

淫羊藿一名仙靈脾淫羊一日百遍食藿所致續博物志淫羊藿曰剛前曰黃連祖曰千兩金曰乾鷄筋曰放杖草曰療杖草閩中曰三枝五葉草舊云西川北部有淫羊食

此草一日百交今謂之仙靈脾草木部

黃芩

圖經曰黃芩生秭歸山谷及寃句今川蜀河東陝西近部皆有之苗長尺餘莖幹麁如筋葉從地四面作叢生類紫草高一尺許亦有蜀莖者葉細長青色兩、相對六月開紫花根黃如知母麁細長四五寸二月八月採根暴乾用之吳普本草云黃芩又名印頭一名內虛一月生赤黃葉兩、四、相值其莖空中或方圓高三四尺花紫紅赤五月實黑根黃二月九月採與今所有小異

狗脊

圖經曰狗脊生常山川谷今太行山淄溫眉州亦有根黑色長三四寸兩指許大苗尖細碎青色高一尺已耒無花其莖葉似貫衆而細其根長而多岐似狗脊骨故以名之其肉青綠春秋採根暴乾用今方亦用金毛者

狗脊曰百枝曰強脊曰扶蓋曰扶筋葉類蕨根類菝葜草  
解草解曰赤節菝葜曰金剛根謂其根堅曰王瓜草謂其  
苗葉與王瓜相近草木畧

石龍芮

圖經曰石龍芮生泰山川澤石邊陶隱居云近道處有之今惟出兗州一叢數莖莖青紫色每莖三葉其葉芮短小多刻缺子如葶藶而色黃五月採子二月八月採皮陰乾用能逐諸風除心熱燥蘇恭云俗名水葶苗如附子實如桑椹生下濕地此乃水葶非石龍芮也今兗州所生者正與本經陶說相合為得其真矣本草

石龍芮今有兩種水中生者葉光而末圓陸生者葉毛而末銳入藥用生水者陸生亦謂之天灸取小葉揉繫臂上一夜作大泡如火燒者是也筆談

石龍芮俗名猫跡草葉毛而尖取葉揉臂上成泡謂之天  
灸治久瘡不愈續醫說

石龍芮曰魯果能曰地椹曰石能曰彭根曰天豆沈括云  
有兩種水中生者葉光而末圓陸生者葉毛而末銳

薛木

石龍芻

石龍芻叢生俗名龍鬚草今人以為席者八閩通志

龍湏草龍泉縣東南三十五里巾子石出一統志

龍鬚草長二尺勁細無節叢生岩壁採者攀緣而後得織以為席精密可愛也九華山志

龍鬚長二三尺青條叢生勁細無節雲岩志

石龍芻曰龍湏曰草續斷曰龍朱曰龍華曰懸莞曰草毒曰方賓爾雅所謂葍鼠莞也生被崖垂下故得龍湏之名可以為席草木畧

爾雅曰葍坊葍鼠莞註亦莞屬也纖細似龍鬚可以為席

蜀中出好者

前胡

圖經曰前胡舊不善所出州土今陝西梁漢江淮荆襄州郡及相州孟州皆有之春生苗青白色似斜蒿初出時有白芽長三四寸味甚香美又似芸蒿七月內開白花與蔥花相類八月結實根細青紫色二月八月採暴乾今鄜延將耒者大與柴胡相似但柴胡赤色而脆前胡黃而柔軟不同耳一說今諸方所用前胡皆不同京師北地者色黃白枯脆絕無氣味江東乃有二四種一種類當歸皮斑黑肌黃而脂潤氣味濃烈一種色理黃白似人參而細短香味都微又有如草烏豆膚黑而堅有兩三歧為一本者食

之亦戟人咽喉中破以薑汁漬搗服之甚下膈解痰實然  
皆非前胡也今最上者出吳中又壽春生者皆類柴胡而  
大氣芳烈味亦濃苦療痰下氣最要都勝諸道者

白鮮

園經曰白鮮生上谷川谷及寃句今河中江寧府滁州潤州亦有之苗高尺餘莖青葉稍白如槐亦似茱萸四月開花淡紫色似小蜀葵根似蔓青皮黃白而心實四月五月採根陰乾用又云宜二月採差晚則虛惡也其氣息都似羊羶故俗呼為白羊鮮又各地羊羶又名金雀兒椒其苗山人以為菜茹

敗醬

敗醬曰鹿腸曰鹿首曰馬草曰澤敗曰鹿醬  
似菰胡作敗醬氣故以得名草木畧  
似菰

酸漿

圖經曰酸漿生荆楚川澤及人家田園中今處：有之苗似水茄而小葉亦可食實作房如囊：中有子如梅李大赤黃色小兒食之尤有益可除熱根似菹芹色白絕苦搗其汁飲之治黃病多效五月採陰乾爾雅所謂葳寒槩耶璞注云今酸漿草江東人呼為苦葳是也今醫方稀用衍義曰酸漿今天下皆有之苗如天茄子開小白花結青殼熟則深紅殼中子大如櫻亦紅色櫻中腹有細子如落蘇之子食之有青草氣此即苦耽也今圖經又立苦耽條顯然重複本經無苦耽

酸漿曰寒漿曰醋漿江東曰苦葳俗謂之三葉酸漿沈括云即苦耽也其實如撮口袋中有珠子熟則紅閉中謂之洛神珠亦曰玉母珠亦曰皮弁草以其實又似弁也又有一種小者名苦識草木畧

爾雅曰葳寒漿註今酸漿草江東呼曰苦針疏葳一名寒漿按本草酸漿一名醋漿陶注云處人家多有葉亦可食子作房中有子如梅李大皆黃赤色

苦耽即本草酸漿也新集本草又重出苦耽一條河西番界中酸漿有盈丈者筆談

紫參

圖經曰紫參生河西及寬甸山谷今河中解晉齊及淮蜀  
州郡皆有之苗長一二尺根淡紫色如地黃狀莖青而細  
葉亦青似槐葉亦有似羊蹄者五月開花白色似蔥花亦  
有紅紫而似水蘘者根皮紫黑肉紅白色肉淺而皮深三  
月採根火炙令紫色又云六月採晒乾用

藁本

圖經曰藁本生崇山山谷今西川河東州郡及兗州杭州  
有之葉似白芷香又似芎藭但芎藭似水芹而大藁本葉  
細耳根上苗下似禾藁故以名之五月有白花七八月結  
子根紫色正月二月採根暴乾三十日成

藁本曰鬼卿曰地新曰微莖草木畧

石常

圖經曰石常生華陰山谷石上今晉絳滌海福州江寧府皆有之叢生石上葉如柳皆有毛而斑點如皮故以名之  
以不聞水聲者良二月七月採葉陰乾用南中醫人炒末  
冷酒調服療發背甚効石常一名石皮而福州自有一種  
石皮三月有花 月採葉煎浴湯主風又有生古瓦屋上  
者名瓦常用治淋亦佳

石常曰石韮曰石皮生於石崖其生瓦上者曰瓦常皆感  
陰濕而生每莖抽一葉背有毛而斑點其狀如皮故得常  
名草木畧

草薺

圖經曰草薺生真定山谷今河陝京東荆蜀諸郡有之根黃白色多節三指許大苗葉俱青作蔓生葉作三叉似山芋又似菘豆葉花有黃紅白數種亦有無花結白子者春秋採根暴乾舊說此藥有二種莖有刺者根白實無刺者根虛軟以軟者為勝今成德軍新產者根亦如山芋體梗其苗引蔓葉似蕎麥子三稜不拘時月採其根用利刃切作片子暴乾用之本草

草薺外臺秘要云建武中軍伍往南陽擊虜所得惡瘡呼為虜瘡劇者數日而死或有得差其瘡癥紫黯色彌年方

戒此惡毒之氣所致也弘治末年民間患惡瘡自廣東人始吳人不識呼為廣瘡又以其形似謂之楊梅瘡若病人血虛者服輕粉重劑致生結毒鼻爛足穿遂成痼疾終身不愈近醫家以草薺鮮肥者四五兩為君佐以風藥隨上下加減服者多效按本草元命苞云草薺味甘平無毒主腰背骨節疼痛治風濕痺痺不仁療癰瘕軟風治惡瘡久不愈生真定山谷今荆蜀有之九有二種無刺虛軟為勝有刺白實次之一名仙遺糧一名土茯苓俗謂之冷飯團是也續醫說

白薇

圖經曰白薇生平原川谷今陝西諸郡及川滌舒濶遼州亦有之莖葉俱青頗類柳葉六七月開紅花八月結實根黃白色類牛膝而短小三月三日採根陰乾用今云八月採

白薇曰白幕曰薇草曰春草曰骨美草木畧

接莢

陶隱居云此有三種大略根苗並相類接莢莖紫短小多細刺小減草薺而色深人用作飲唐本注云陶云三種相類非也草薺有刺者葉粗相類根不相類草薺細長而白接莢根作塊結黃赤色殊非狗脊之流也臣禹錫等謹按日華子云治時疾瘟瘴葉治風腫止痛撲損惡瘡以鹽塗傳佳又名今剛根又名黃瓜草

圖經曰接莢舊不載所出州土但云生山野今近京及江浙州郡多有之苗莖成蔓長二三尺有刺其葉如冬青烏藥葉又似稜葉差大秋生黃花結黑子櫻桃許大其根作

塊赤黃色二月八月採根暴乾用江浙間人呼為金剛根  
浸赤汁以煮粉食云噉之可以辟瘴其葉以鹽搗傳風腫  
惡瘡等俗用有效田舍貧家亦取以釀酒治風毒脚弱痺  
滿上氣殊佳

大青

圖經曰大青舊不載所出州土今江東州郡及荆南眉蜀  
濠淄諸州皆有之春生青紫莖似石竹苗葉花紅紫色似  
馬蓼亦似芫花根黃三月四月採莖葉陰乾用

大青彭志云身高二尺好陰惡晒搗汁可染興化府志

石香薷

石香薷味辛香溫無毒主調中溫胃止霍亂吐瀉心腹脹  
滿臍腹痛腸鳴一名石蘇生蜀郡陵榮資簡州及南中諸  
處在山岩石縫中生二月八月採苗莖花實俱用今附  
衍義曰石香薷處有之不必山岩石縫中但山中臨水  
附崖處或有之九月十月尚有花

風延母

風延母味苦寒無毒小兒發熱發強驚癇寒熱、淋解煩  
利小便明目主蛇犬毒惡瘡癰腫黃疸並煮服之細葉蔓  
生纓繞草木南都賦云風蔓延於衡阜是也草木畧同

耕香

耕香味辛溫無毒主臭鬼氣調中生烏許國南方草木狀  
曰耕香莖生細葉

大瓠藤

大瓠藤水味甘寒無毒主煩熱止渴潤五臟利小便藤如瓠斷之水出生南安太康地記曰朱崖儋耳無水處種用此藤取汁用之海藥云謹按大原記云生安南朱崖上彼無水淮大瓠中有天生水味甘冷香美主解大熱止煩渴潤五臟利水道彼人造飲饌皆瓠也

筋子

筋子根味苦溫無毒主心腹痛不問冷熱遠近惡鬼氣注  
刺痛霍亂蠱毒暴下血服冷不調酒飲磨服生四明山苗  
高丈餘葉圓厚光潤冬不凋根大如指亦名根子

土芋

土芋味甘寒小毒解諸藥毒生研水服當吐出惡物盡便  
止煮食之甘美不飢厚人腸胃去熱嗽蔓如豆根圓如卵  
鷄：食後彌吐人不可食

優殿

優殿味辛溫去惡氣溫中消食生安南人種為茹南方草木狀曰合浦有優殿人種之以豆醬汁而食芳香草木畧

土落草

土落草味甘溫無毒主腹冷疼氣痞癖作煎酒亦搗絞汁溫服葉細長生嶺南山谷土人服之

倬菜

倬菜味辛溫無毒主冷氣服內久寒食飲不消令人能食  
字林曰倬辛菜南人食之去冷氣

倬菜字林云味辛南人食之去冷氣草木畧

必似勒

必似勒味辛溫無毒主冷氣胃閉不消食心腹脹滿生崑  
崑似馬蘭子

胡面芥

胡面芥味甘温去痰癖及冷氣止腹痛煮之生嶺南葉如地黃

海蘊

海蘊味鹹寒無毒主瘰癧結氣在喉間下水生大海中細葉如馬尾似海藻而短也

百丈青

百丈青味苦寒平無毒主解諸毒物天行瘡癰疫毒並煮服亦生搗絞汁生江南林澤藤蔓緊硬葉如薯蕷對生根服令人下痢

斫合子

斫合子無毒主金瘡生膚止血搗碎傳瘡上葉主目熱赤按滴目中云昔漢高帝戰時用此傳軍士金瘡故云研合子籬落間藤蔓生至秋霜子如柳絮一名薰桑一名鷄腸

獨自草

獨自草有大毒煎傳箭鏃人中之立死生西南夷中獨莖生續漢書曰出西夜國人之輒死今西南夷獠中猶用此藥傳箭鏃解之法在拾遺石部鹽藥條中

金釵股

金釵股味辛平小毒解諸藥毒人中毒者煮汁服之亦生研更烈必大吐下如無毒亦吐去熱瘰瘡瘡天行蠱毒喉閉生嶺南山谷根如細辛三四十莖一名三十根釵子股嶺南人用之

博落迴

博落迴有大毒主惡瘡癰根瘤贅瘕肉白癩風蠱毒精魅  
溪毒已上瘡癰者和百大青鷄桑灰等為末傳癩瘡蠱毒  
精魅當有別法生江南山谷莖葉如單麻莖中空吹作聲  
如博落迴拆之有黃汁藥人立死不可入口也

落迴一曰博落迴有大毒生江淮山谷中莖葉如麻莖中  
空吹作聲如勃邏迴因名之酉陽雜俎

毛建草

毛建草及子味辛溫有毒主惡瘡癰腫疼痛未潰煎搗葉  
傳之不得入瘡令人肉爛主瘡令病者取一握微碎縛臂  
上男左女右勿令近肉便即成瘡子和薑搗破、冷氣田  
野間呼為猴蒜生江東澤畔葉如芥而大上有毛黃子如  
蒺藜又有建有毒生水旁葉似胡芹未間餘功大相似

數低

數低味甘溫無毒主冷風冷氣下宿食不消脹滿生西蕃  
北土亦無有似茴香胡人作羹食之

仰盆

仰盆味辛溫有小毒主蠱飛尸喉閉水磨服少許亦磨傅  
皮膚惡腫生東陽山谷苗似承露仙根圓如仰盆子大如  
鷄卵

離鬲草

離鬲草味辛寒有小毒主瘰癧丹毒小兒無辜寒熱大腹  
痞滿疫飲膈上熱生研絞汁服一合當吐出背膈間宿物  
生人家堦庭濕處高二三寸苗葉似畧歷去瘡為上江東  
有之北土無

盧藥

盧藥味鹹溫無毒主拆傷內損瘀血生膚止痛主產後血  
病治五臟除邪氣補虛損乳及水煮服之亦搗碎傅傷拆  
處生胡國似乾茅黃赤色